

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 23/9

6 սեպտեմբերի 2016թ.

Քննարկվեց քաղաքացի Արմեն Օթարյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 04.07.2016թ. թիվ 327274/02 որոշման դեմ:

Քաղաքացի Արմեն Օթարյանի գանգատում բերված փաստարկները.

ՀՀ կառավարության 30.10.14թ. թիվ 1276-Ա որոշմամբ «Արարատ Ռեստորան» ՍՊԸ-ն գտնվել է լուծարման գործընթացում:

«Արարատ Ռեստորան» ՍՊԸ-ի 100 տոկոս բաժնեմասը ՀՀ կառավարությանն առընթեր պետական գույքի կառավարման վարչությանը փոխանցվելուց հետո 04.02.2016թ. Արմեն Օթարյանը նշանակվել է ընկերության տնօրենի ժամանակավոր պաշտոնակատար: ՀՀ ԿԱ ՊԵԿ նախագահի 08.04.2016թ. թիվ 1003303 հանձնարարագրով Կենտրոնի ՀՏ-ի կողմից 25.04.2016թ. ընկերությունում իրականացվել է բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության լուծարային ստուգում, որի արդյունքում արձանագրվել են հարկային պարտավորություններ:

Արմեն Օթարյանը տեղեկացնում է, որ ստուգման արդյունքում արձանագրված խախտումները կատարվել են մինչ իր տնօրեն նշանակվելը և իր գործունեության հետ որևէ առնչություն չունեն: Ավելին, ՀՀ կառավարության որոշմամբ և պայմանագրով սահմանված է, որ ընկերության նախկին սեփականատերերը պատասխանատվություն են կրում ընկերության բաժնեմասի վաճառքից հետո ի հայտ եկած ընկերության ցանկացած վճարային պարտավորության համար, որը մինչև բաժնեմասի փոխանցումն առաջացել է ընկերության գործունեությունից:

Հաշվի առնելով վերոգրյալը, Արմեն Օթարյանը խնդրում է վերանայել ՀՀ ԿԱ ՊԵԿ աշխատակազմի իրավաբանական վարչության պետի 04.07.2016թ. թիվ 327274/02 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննելով վարչական իրավախախտման վերաբերյալ թիվ 3206 գործը և ուսումնասիրելով վարչական իրավախախտման վերաբերյալ 27.06.2016թ. թիվ 3206 արձանագրությունը պարզել է, որ «Արարատ Ռեստորան» ՍՊԸ տնօրեն Արմեն Օթարյանը համաձայն Կենտրոնի ՀՏ 08.06.2016թ. թիվ 1003303 ակտի հաշվապահական հաշվառումը վարել է այնպիսի խախտումներով, որն առաջացրել է (կարող է առաջացնել) հարկի նվազեցում: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 1-ին մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 04.07.2016թ-ին ընդունվել է վարչական

իրավախախտման գործի վերաբերյալ թիվ 327274/02 որոշումը (այսուհետ նաև Որոշում), որով Արմեն Օթարյանը ենթարկվել է վարչական պատասխանատվության՝ գումարով 25.000 դրամի չափով:

Քննարկվող դեպքում Արմեն Օթարյանին վարչական պատասխանատվության ենթարկելու համար հիմք է հանդիսացել «Արարատ Ռեստորան» ՍՊԸ-ի նկատմամբ Կենտրոնի ՀՏ 08.06.2016թ. թիվ 1003303 ակտը կազմված լինելու հանգամանքը: Նշված ակտով լրացուցիչ պարտավորություններ են առաջադրվել այն հաշվետու ժամանակաշրջաններում իրականացված խախտումների համար, որոնք կատարվել են մինչև Արմեն Օթարյանին ընկերության տնօրենի ժամանակավոր պաշտոնակատարի պաշտոնում նշանակվելն ընկած ժամանակահատվածում:

Հարկ է նշել նաև, որ «Արարատ Ռեստորան» ՍՊԸ սեփականատերի անունից հանդես եկող լիազոր անձանց (Վաճառող-Գրավառուներ) և ՀՀ կառավարությանն առընթեր պետական գույքի կառավարման վարչության (Գնորդ-Գրավատու) միջև 29.01.2016թ. կնքվել է Սահմանափակ պատասխանատվությամբ ընկերության 100 տոկոս բաժնեմասերը մասնակից ֆիզիկական անձանցից գնման և գրավի մասին պայմանագիրը (այսուհետ՝ Պայմանագիր): Պայմանագրի 2.1 կետի համաձայն Վաճառող-Գրավառուները իրենց սեփականության իրավունքով պատկանող կանոնադրական կապիտալի 100 տոկոս բաժնեմասը վաճառել են Գնորդ-Գրավատուին: Ընդ որում, Պայմանագրի 7.3 կետով սահմանվել է, որ Վաճառող-Գրավառուները հավաստիացնում են, որ պատասխանատվություն են կրում Ընկերության բաժնեմասի վաճառքից հետո ի հայտ եկած՝ Ընկերության ցանկացած վճարային պարտավորության համար, որը մինչև բաժնեմասի փոխանցումն առաջացել է Ընկերության գործունեությունից:

Այսուհետև, «Արարատ Ռեստորան» ՍՊԸ-ի և Արմեն Օթարյանի միջև 04.02.2016թ. կնքվել է աշխատանքային պայմանագիր, որի համաձայն Արմեն Օթարյանը նշանակվել է ընկերության տնօրենի ժամանակավոր պաշտոնակատարի պաշտոնում:

Հանձնաժողովը գտնում է, որ վերոգրյալ փաստական հանգամանքները վկայում են այն մասին, որ Կենտրոնի ՀՏ 08.06.2016թ. թիվ 1003303 ակտով արձանագրված խախտումների համար Արմեն Օթարյանը պատասխանատվություն չի կրել:

Քննարկվող դեպքում Վարչական իրավախախտումների վերաբերյալ ՀՀ օրենսգրքի 169.1-րդ հոդվածի 1-ին մասով նախատեսված պատասխանատվության միջոցը կիրառելի չէ, քանի որ զանցակազմը լիարժեք չէ, արարքի սուբյեկտիվ կողմի՝ մեղքի բացակայության պատճառով:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Բեկանել ՀՀ ԿԱ ՊԵԿ աշխատակազմի իրավաբանական վարչության պետի 04.07.2016թ. թիվ 327274/02 որոշումը, իսկ գործը կարճել:

Հանձնաժողովի նախագահ՝



Վ.ՄԻՐՈՒՄՅԱՆ